




初唐四傑集  
 楊盈川集  
 戊

詩文牙一  
 十  
 五

土岐文庫  
 文庫17  
 W54  
 5





文四 17  
W54  
5

楊盈川集卷四

碑

大唐益州大都督府新都縣學先聖廟堂碑文序並

敘曰銀衡用九天門壓西北之荒銅蓋虛三地戶坼東南之野迴七星於上列太清不能潛混茫之機環四海於中州巨塊不能祕生成之業聖人有以見天下之曠擬諸形容聖人有以見天下之動行其典禮靈圖廣運百姓日用而不知神理潛行萬方樂推而不厭古者熊山南眺金崇橫上帝之居鳳穴西臨玉室攷爰皇之宅

楊盈川集卷四

一 隄雅居



010185141376



五龍乘正按天讖以希微六羽提衡驗星謠而汗漫洎  
平尊盧赫胥之代驪連栗陸之君皇名邁於上元帝圖始  
於中葉莫不憑三靈之寶位鼓舞陰陽藉六合之尊名財  
成宇宙未有貴而無位博而無名大禮由其再造大樂出  
其一變蕩蕩乎民無得而稱焉巍巍乎其有成功者也若  
夫司徒立勳於天地還承帝嚳之家微子開國於商周仍  
纂成湯之業雖元禽歷數推移於景亳之都而白馬旗裳  
赫奕於風邱之國由是千年有屬萬物知歸乾坤合而  
至德生日月會而明靈降奎婁胃昴風驅白虎之精角

亢房心雲鬱青龍之祉君王異表儀石紐而法丹陵輔  
相宏資狀皋陶而圖子產豈止鑿就元象摛光芒於北  
斗之宮括成地形騰瑞氣於東山之曲非天下之至精  
其孰能與於此神冥造化德合陶鈞獲沖用於生知運  
幽機於性道窮庶事之終始協庶品之自然覩者不識  
其靈仰者不知其德步三光於太極照曜三門含萬象  
於中區聲明萬國惟深也能通天下之志惟幾也能成  
天下之務非天下之至神其孰能與於此道尊德貴挫  
銳同塵始於中都宰終於大司寇能使長幼異節男女



別途路無拾遺器不雕僞奸雄獨立初明兩觀之誅政  
教未行仍赦同狴之罪盟齊侯而歸四邑夷不亂華黜  
季氏而覆三都家無藏甲非天下之至剛其孰能與於  
此青光歇滅赤籙衰微一匡爲海岱之尊一戰有河防  
之霸故得三王不相襲禮亡於寇戎五帝不相沿樂入  
於河海是以哀生靈之板蕩痛寓縣之分崩歷聘諸侯  
栖遑異國其爲大也法象莫之能容其爲高也黎元莫  
之能覩時非我與遂厄宋而圍陳道不吾行終樂天而  
知命非天下之至柔其孰能與於此泰山不辭土壤故

能成其高滄海不讓細流故能成其大自季孫之賜我  
也交益親矣自敬叔之乘我也道彌尊矣於是歷郊社  
之所考明堂之則金人右對仍觀太祖之階斧扆前臨  
還訪周公之位然後刪詩書而續易象動天地而感鬼  
神運百代之舟車開千齡之戶牖是故雷精日角聞道  
德而樞衣月頰山庭奉琴書而撰杖非天下之至文其  
孰能與於此智以藏往有感而必通神以知來無微而  
不照論五行於帝輔潛觀太皞之先揆七廟於天災預  
察釐王之過星流十月徵歷象於衰周日汎三江採謳



謠於霸楚神無方而易無體聖人通變化之津河出圖而洛出書聖人悟興亡之兆非天下之至明其孰能與於此極天蟠地之禮周旋揖讓之規百神於是會昌二儀以之同節非禮無以別父子兄弟親疎之序非禮無以辨君臣上下長幼之位本之於元氣徵之於太古德足以法於九圍道足以周於八極服先王之制度黜紅紫而無施斂上帝之明威感風雷而有變非天下之至恭其孰能與於此五行四氣十二月還相爲本五聲六律十二管還相爲宮至音將簡易同和廣樂與神明合

契盛於中國還陳武象之容奄有四方自得文王之操南風奏雅知大舜之溫北里宣淫體殷辛之暴非天下之至和其孰能與於此悲夫日中則昃動靜之常也月滿則虧盈虛之數也自太平王佐委龍翰於芳年禮義霸臣摧獸文於華月則知天之將喪也則知道之將廢也雖復頽山壞木兆悲歌於兩楹夏棟周牆陳盛制於三禮猶使文明炤爛百王知察變之機鐘石鏗鏘萬代挹希聲之樂信可謂備物致用立成器以爲天下利者莫大於聖人也旣而三河失統九州之寶幣不歸四塞



提衡萬里之長城繼作星祆日祲乾象暗而恆文乖禮  
壞樂崩彝倫敦而舊章缺洎夫碭山休氣潛膺赤帝之  
圖沛國真人密召黃星之錄尊褒成之厚級殷崇聖之  
榮班學校於是大興文武由其不墜年當晉宋運距周  
隋泰山覆而崑崙倒天柱傾而地維絕三重赤暈還開  
爭戰之端千里黃埃洊有干戈之務亂罹瘼矣黔首何  
依王室蠢然蒼生無主閭閻市地今來爲講武之場荆  
棘參天昔日作談經之市皇家撥亂返正應天順人鼓  
之以雷霆潤之以風雨馳欃槍而掃穢上廓鵬雲決河

海以澄好下清鼇極今天子握大象運洪鑪星重輝海  
重潤乾迴北列垂衣裳於太紫之宮日出東方備法駕  
於中黃之道混沌之無天無地盡入提封伯陽之有物  
有象咸乘禮節太階三襲明瑞氣於朱符中極四遊法  
祥光於玉燭東膠西序雲閣蓬邱國號陶唐家成鄒魯  
遂使西山童子陳歌謠於璧水之前南國老人受几杖  
於環林之下乾坤之大德行矣皇王之盛節明矣江芴  
鄙黍晨昏薦帝之祥鳳穴麟洲晷刻因天之瑞乘輿乃  
選吉日協靈辰詔風伯以行觀促雷師而出豫房爲天



駟仍施列缺之鞭斗爲帝車卽動招搖之柄莫玉帛奏  
金絲登介卽下梁甫擁神休而尊明號莫之與京按玉  
冊而考銀繩於斯爲盛於是迴輿轉旆臨曲阜之郊畿  
駐蹕停鑾訪雲壇之軌跡若使九原可作大君得廊廟  
之才千載有知夫子託風雲之會卽以乾封元年追贈  
太師禮也咸亨元年三韓宣尼有縱自天體膺上哲合  
兩儀之簡易爲億載之天表顧惟寢廟義在欽崇諸州  
縣廟堂及學館有破壞并先來未造者遂使生徒無肄  
業之所先師闕奠祭之儀久致飄零深非敬本宜令州

縣速加營葺新都學廟堂者奉詔之所立也因三農之  
暇陳複道之規考幃帳於西京訪埃塵於東魯梅梁桂  
柱深沈風雨之津鏤櫺文櫺曠望江山之表納流雲於  
上棟白日非遙披濁霧於中階青天在矚雕鏤睥煜窮  
妙飾於重欄山海高深盡靈姿於岌宇門生侃侃如陪  
文杏之壇胄子鏘鏘若預崇蘭之室每至南方二月草  
樹華滋北陸三秋風烟搖落莫不列蘋蘩於上席行禮  
敬於質明奠椒桂於中尊敬神明於如在爾其邑居重  
複原野平蕪出江干之萬里入參星之七度龜城藹藹



煥繁霞於百尺之樓蛟浦澄澄洗明月於千秋之水文  
翁舊學日往年歸劉禪平堂烟荒霧慘武侯龍伏猶觀  
八陣之圖壯士虵崩仍辨五丁之石左巴右獠之勝域  
陸海三江之奧壤大都督周王天皇第八子也元元繼  
天而作降仙才於玉斗之庭武昭應運而生開霸業於  
金城之域五潢高映流滋液於咸池十日旁羅散光華  
於若木星懸帝子遙澄井絡之郊岳列天孫遠控彭門  
之野姬公以明德之重行寶化於周南曹植以懿親之  
賢發金聲於魯北通議大夫行長史南陽來恒隋十二

衛大將軍榮國公之二元子申侯太岳鎮其靈襟傳說長  
河昭其神彩龐士元蓄西申之逸羽始踐題輿管公明  
紆東道之雄姿初臨別乘朝議大夫守司馬宇文紀左  
衛將軍靈州都督之次子台門鼎族傳呼棨戟之榮玉  
質金相海若河宗之寶庾冰清識得嚴令而非常桓溫  
貴遊無郗公而不樂縣令鄭元嘉滎陽人也東周玉裔  
北海金宗列矛戟之森森吐風流而禱禱尺兵不用瑕  
邱有上德之君枹鼓希聞洛陽有神明之宰丞京兆韋  
德工主簿扶風馬仁礪尉清河張嗣明北地傅懷愛等



荆藍灼爍鄧杞扶疎許元度入風月之清關郭林宗獲  
神仙之妙境南昌晦跡其梅福而齊衡左部韜真與喬  
元而等列博士張元鑒助教費仁敬等碧雞雄辯則滄  
海沸騰白鳳宏辭則烟霞噴薄一州聞道親居典學之  
官四子乘風來聽中和之曲圓冠列侍執巾為於西階  
大帶諸生受詩書於北面泮宮之上更開通德之門小  
學之前復見華陰之市鄉望等魚文驥子震耀於平原  
漢女巴姬駢羅於甲第杜陵亭長終成輔相之才桐鄉  
留夫且著廉平之號莫不公私務隙卽聽絃歌陰雨時

閒仍觀俎豆逍遙城郭拜夫子之靈祠髣髴風塵見夫  
子之遺像天道之璣衡莫測下問書生陽精之遠近未  
知來求小子當仁不讓思齊於上古之名遊聖難言有  
愧於中郎之石銘曰

太虛寥廓洪鑪噴薄上綴三宮旁清八絡元精獨化聖  
人攸作鼇柱為居龍門是託爰清爰淨惟寂惟冥其龜  
識韜名魚圖表靈火紀雲紀天正地正君臣禮制宇宙  
輝明文武既沒成康遂行羣飛海水若羽天星其玉筐  
曾裔金符遠系鐘石雖遷山河不替乾坤降德陰陽合



契虎嘯風清龍騰雲逝三元載佇萬方攸濟其魯道既

昏絲絲若存祿移公室政在私門學而方仕謙而彌尊

聽之也厲卽之也溫義責齊國刑懲季孫其多能惟聖

道廢惟命天下莫容諸侯走聘至於是邦必聞其政仁

義立身溫恭成性不圖爲樂終悲擊磬其九野八方栖

栖遑遑從周返魯攷夏觀商先王道術夫子文章可久

可大爲龍爲光星衡入室月準升堂其智周通塞神兼

語默頽然而長黯然而息漢承周運胡亡秦國察往知

來研精茂德無必無我自南自北其萬象皆尊于靈共

同惟變所適居常待終樂天知命匪我求蒙北辰之北

東海之東百王遺訓萬世餘風其時亡玉斗運鍾陽九

周井龍沈秦原鹿走生人卷舌道路鉗口禮樂崩頽典

章殘朽萬邦請命三靈授手其九日角昇圖星精應符載

揚風教重闡規模數遷三國年當五胡星芒夜指日暈

朝枯環林摧折璧沼荒蕪其赫矣高皇越若稽古丕哉

文皇昭臨下土地維旁綴乾紘上補鯤化三千龍飛九

五爰有列聖重規襲矩其一我君文思念茲在茲金鏡

八海珠囊四時三雍九室秋禮冬詩絳帳語道青衿質



疑載垂仙渙廣創靈祠

其二

披圖按籍遠求陳跡玉檻

烟開金窗雨闕醉儀侷雲居寂寂弟子摠衣門人避

席階列簠簋庭羅絲石

其三

地接臨邛山橫劍峰滇池

躍馬沮澤蟠龍中望擊節高門叩鐘陰靈肸蠁文雅雍

容書池必變坐席常重

其四

今還古往寂寥無尚泰山

既頽吾將安仰梁木斯壞吾將安放異代風行殊塗影

響敢立言而徵聖冀得意而忘象

其五

遂州長江縣先聖孔子廟堂碑

法象莫大乎天地變通莫大乎四時懸象著明莫大乎

日月備物致用莫大乎聖人夫子諱某字仲尼魯國鄒

人也龜龍負識帝鴻驅八翼之軒魚鳥呈文天乙降三

分之璧五十二戰權輿驟帝之都二十七征草昧馳王

之業平域中之禍亂掃天下之虔劉以盛德大業之尊

當開階立隧之重及其山崩海竭日薄星迴歷數不還

謳謠遂遠元子賓周而建國二王之車服可尋上卿翼

宋而承家三命之衣冠再襲是故陰陽混合洩符瑞於

平鄉宇宙氤氳灑休徵於闕里龍準而龜背月角而雷

聲有軒帝之殊姿有殷王之異表山開遁甲尼邱落於



紫垣星掌巫咸鉤鈐墜於蒼陸淨光童子來遊姬旦之  
郊乾象明靈下俯庖犧之國十五而志學三十而有成  
申下問於伯陽屈帝師於郊子天爲木鐸九州知發號  
之期吾豈匏瓜一國有來蘇之望嘗登委吏稍踐中都  
天下可臨諸侯取則以之禮而國定司空之官以成禮  
以之義而國平司寇之官以成義掌山林於夏典物得  
其生聽獄訟於秋官人忘其死大夫亂法仍行兩觀之  
誅陪臣執權卽問三雍之罪強公室弱私家敘君臣明  
長幼用能使犧牲秬鬯不登闔閭之庭羽戟旌旄不列

壇場之位當是時也三光薄蝕九土分崩夷狄有君中  
華無禮周京赫赫成康之至教蔑聞魯國巖巖賢聖之  
餘風已墜河圖未出吾道不行周流八方經營四海治  
亂運也窮通命也荷天下之至聖仍逢盜跖之軍仗天  
下之至和猶有匡人之逼德生於我樂天命而何憂文  
不在茲臨大難而無懼使仁者必信安有伯夷使智者  
必行安有王子豈三千擊水牛蹄不能鼓橫海之鱗九  
萬搏風雞羽不能扇垂天之翼然後上不臣天子下不  
事諸侯乘殷之輅服周之冕或屈伸於季孟之間或動



靜於魚龍之際下學而上達將聖而多能博而無名信  
 而好古察殷周之禮樂損益可知觀杞宋之文章賢才  
 不足數年學易伏羲龍馬之圖三月聞韶媯帝鳳凰之  
 典信存乎德術數貫於神明意見乎時制作侔於造化  
 已所不欲則一言可以終身人之莫違則一言可以亡  
 國惡鄭衛之亂雅樂惡利口之覆邦家榮辱定於樞機  
 褒貶存乎簡牘精誠密召北辰開紫掖之星福應全來  
 中極敷元雲之氣乃若知幽明之故見天地之心有感  
 而遂通不行而克至年當甲子潛知啓漢之萌音協宮

商預察亡秦之兆星移大火追責天司月入純陽一作陽街

無勞雨一作兩備季桓子殯羊之井推木石之禎祥陳惠

公集隼之庭驗蠻夷之貢賦然後歷三辰而玉步照四  
 極而金聲坐於緇帷之林浮於亶州之海門生七十仰  
 天路以無階弟子三千望宮牆而不入哲人之能事畢  
 矣先王之至德行矣配乎二象不能遷必至之期參乎  
 兩曜不能稽有一作非常之動南遊楚國遂聞衰鳳之歌  
 西狩魯郊獨有傷麟之泣夫子周靈王二十一年冬十  
 月庚子生至魯哀公十有六年夏四月己丑卒凡享年



七十三於今一千餘歲泰山頽而梁木壞微言絕而大義乖傳饗祀於百家奉琴書於十代秦始皇見登牀之識始亂衣裳魯恭王看壞壁之書猶聞絲竹漢圖起於六千日賜金之禮載優魏德行於五十年刻石之風未泯述文武者皆憲章於聖人修學校者僉折衷於夫子自革鞫玉厯毳幕瑤圖皇天無皂白之徵戎狄起豺狼之釁摧六律絕笙竽塞師曠之耳天下之人廢其聽矣散五彩滅文章膠離朱之目天下之人黜其明矣我高祖神堯皇帝因三靈之寶歷藉萬國之歡心風起北方月行中道削平宇宙戢干戈於羊馬之年彈壓華夷照文物於龍蛇之代太宗文武聖皇帝昇瑤壇於曲洛受玉版於平河經天緯地盪海夷嶽坐元宮而密轉紫微光帝宅之尊戴黃屋以深居赤縣列神州之貴今上天無私覆道不虛行馭六氣而平太階乘八風而制羣動星連月合層臺有觀朔之勞海晏河移直筆有書祥之倦封泰山而禪梁甫千載同歸敞衢室而築明堂百靈咸秩雲行雨施品物流形天尊地卑乾坤定矣若乃虞夏商周之禮攷正朔而三遷東南西北之人混風聲而



一變環林拂日映高柳而對扶桑圓海澄天走鯤池而  
涵象浦粵以乾封元年有詔追贈夫子爲太師咸亨元  
年又詔州縣官司營葺學廟憑風雲於異代照日月於  
殊塗逝者有知歿而無朽如綸如綍大君施號令之嚴  
匪朴匪雕上宰極司存之敬長江合楊公宏農華陰人  
也卽華山公之孫大將軍之子朱宮帶地明河一葦之  
西黃闕中天神嶽千花之北山川壯麗於區宇人物繁  
多於海內齊九龍而闊步一門鍾豹變之榮襲五公而  
長驅四代赫蟬聯之社出忠入孝誕秀興賢冠蓋城邑

池臺鐘鼓英靈輻輳鏘鏘萬玉之門嘉瑞駢羅濟濟千  
金之子是故北方多士太一壯其魁梧南國仙人中書  
偉其端雅椅桐可仰丹漆兼施照明月於習懷吐清風  
於襟袖臧武仲之智卞莊子之勇可以爲大臣矣韓尙  
書之臨八座發跡下邳卓太尉之踐三階來從密縣自  
操刀入仕聞魯邑之絃聲解劍分司察豐城之寶氣汝  
陰徐令人號無雙河內王君時稱未有飛雪千里不能  
改松柏之心名都十城不能動夷齊之行先是殊方暴  
客常嚴鉅野之兵絕磴奸豪每縱黃池之醜數州常以



爲弊歷政所不能移行人爲之聚眾耕父由其釋耒公  
英謀獨斷銳氣無前奮一劍以戮元兇馳單車而躡遺  
噍道旁牛馬竝屬羅衡縣內神明皆稱傅琰若乃山林  
猛獸動星象而垂文江漢龜眈鼓風颯而作氣城門六  
閉未防虞吏之災都市三言終有山君之暴公雄心裂  
背壯髮衝冠按東海之金刀飛北斗之石箭岡巒不擾  
有符劉孟之城坑穿無虞更似童君之邑自非愛人猶  
子視物如傷豈能躬斬兇渠親除災害與夫赤繩不用  
道被於瑕邱桴鼓希聞化移於京洛可同年語哉然後

示之以禮儀陳之以庠序憑三時之閒暇興役鳩工視  
匹野之川原依城負郭青泥險磴斜連白馬之關赤岸  
長波遠注黃牛之峽懸四方而開益部照參伐於天光  
賦上錯而闢梁州絕岷嶓於地德背山臨水掩全蜀之  
膏腴望日占星探公宮之法度丹牆數仞吐納雲霞椽  
柱三間蔽虧風雨璫璃曉闢東宮雀目之窗玳瑁朝懸  
西漢地鱗之桷圖光芒於北斗聖質猶生赫符彩於連  
珠宏姿可想至於月衡月準山額山庭侃侃星文堂堂  
日角莫不向之如在疑遊北上之山望之儼然似矚東



流之水博士助教某等西州聞望南國英靈駭飛苑於  
文場躍雕龍於筆海揚雄博識神遊象繫之端李邵幽  
通思入璣衡之表每至韶光令月朱鳥乘春爽氣高天  
元龜送歷瓊籟玉豆中堂奉先聖之儀石磬金鐘南面  
習諸侯之禮華陽曾子鼓篋來遊蜀國顏生摳衣請學  
絃歌在側還昇武騎之臺禮樂居前重覩文翁之室祁  
祁茂德濟濟時英聖人千載之風儒者一都之會丞主  
簿尉某等青田戒露望華蓋而長鳴綠地生風下仙閣  
而直轡大夫貞節還居內史之丞文學明經猶歷南昌  
之巖鄉望某等王孫獵騎騁原隰之盤遊公子文鋒叙  
江山之體勢符偉明以都官謝職逢有道而相推趙元  
淑以郡吏從班見司徒而不拜僉以鄉閭少事風月多  
懷命童子於靈臺就門人於相圃冬禮春詩之化再造  
雙川淹中稷下之風一匡三蜀若夫平南壯烈沈流水  
於裁碑逐北勳庸登燕山而刻頌庾太尉新亭之墓尙  
有黃金鄭康成通德之門猶存白死况乎功苞大象績  
被蒼生豈使銘典闕如音塵不嗣是用雕牆峻宇列冠  
蓋於宜城塞陌填街放春秋於太學小人狂簡不知所



以裁之夫子文章今可得而言也詞曰

西崑玉闕南海金堂惟惚惟恍一陰一陽三辰赫赫九  
土茫茫太極天帝神州地皇驪連上古混沌中央降及  
軒頊終於夏商四時玉斗五緯珠囊聖德千載淳風八  
荒天開赤籙日照青光識協金匱兵符玉璜化隆文武  
澤盛成康天子穆穆諸侯皇皇春秋代謝宗社危亡帝  
典無象人倫不綱山河命德天地興祥禮樂三變文明  
一匡原承少典祚啟成湯吹律丹鳳御符白狼三仁去  
國再命循牆不有積善其何以昌降靈鄒邑誕哲平鄉

月角摘彩星鈴吐芒文行忠信恭儉溫良或默或語能  
柔能剛學而不厭師亦何常通禮明德尊賢毀方古之  
君子昔者明王道協公旦神交帝唐攝官從事服冕端  
章示之以德臨之以莊澤如春雨威若秋霜男女斯別  
尊卑克彰時逢板蕩運屬栖遑入齊損味居陳絕糧登  
山極目臨水徜徉無道斯隱舍之則藏季孫大賚敬叔  
揄揚問官鄒子受業師襄神明協贊雅頌鏗鏘紫麟遙  
集丹鳥遠翔生靈水火家國舟航功符日用德協天長  
倏嗟崩嶽奄歎摧梁昧昧神道悠悠彼蒼書開壞宅識



識登牀與代輕重因時弛張  
氊裘黼黻沙漠壇場璣衡  
慘怛載籍膏肓汾河水白  
晉野星黃軒電臨斗殷雷入  
房九圍臣妾八極城隍東序  
西序上庠下庠粵唯銅墨  
實號金箱靈山地輔德水天  
潢芝蘭秀出羔雁成行玉  
匣孤劍瑤臺驩驩懲奸挫右  
濟猛移蝗風傳積石道被  
滄浪絲言渙汗經葺相望夏  
井蓮植秋窗桂芳繡楹文  
琰綺綴明璫四注飛閣三休  
步廊禮行釋菜敬盡明薌  
圖非有若地異空桑伏羲書  
契女媧笙簧匏土金石珪  
琮璧璋高門陳鄭碩學王揚  
威儀秩秩宮徵瑤瑤山樓  
烏鳥水宿鴛鴦蜀門荷戟江  
津濫觴落星高堰明月回  
塘丹碑不朽清廟無疆



楊盈川集卷四

番禺沈葆和初校  
番禺陶福祥覆校

楊盈川集卷五

碑

少室山少姨廟碑

臣聞崑崙西北之天門也則五帝處其陽陸三王居其  
正地泰山東南之日觀也則秦皇刻其石銘漢帝探其  
玉策故知建都邑正方位劃崇墉剡濬洫必憑天地之  
險然後四海為家擁神休尊明號協時月同量衡必致  
山川之祠然後羣神受職少室山者山嶽之神秀也憑  
河圖而括地用遁甲而開山發揮宇宙之精噴薄陰陽



之氣壁立而千仞削成而四方北臨恒碣猶如聚米南望荆衡纔同覆篑共工氏觸皇天之八柱未足擬議龍伯人釣溟海之三山無階想像考於含神霧白玉猶存驗於山海經黃花不落其名有序則太室西偏其位可知則高高佐命若乃乾坤之所合雷雨之所交仰躔七星之野俯鎮三河之曲朝市臨於域中樞機正於天下六合交會於是有天帝之下都九州名山於是有靈仙之窟宅臣謹按少姨廟者則漢書地理志嵩高少室之廟也其神爲婦人像者則故老相傳云啟母塗山之妹

也昔者生於石紐水土所以致其功娶於塗山室家所以成其德后宗之位象南宮之一星外戚之班比西京之列傳惟幾不測其道無方騁神變而揮霍降精靈而矜蠻亦猶蔣侯三妹青溪之軌跡可尋虞帝二妃湘水之波瀾未歇何止祠稱丁婦廟號滕姑少女宅於西宮夫人館於南嶽山臨白岸空聞石室之靈浦對青崖獨有金臺之異若斯而已矣時更魏晉數歷周隋四望於是莫脩八神以之無主炎涼代序寧觀俎豆之容霜露沾衣非復絃歌之地國家乘天造之草昧屬人謀之與



能奄有大寶遂登神器天地水火之無象則女媧氏補之於是乎鍊其五石東西南北之失位則神農氏立之於是乎甄其四海天皇貴與天平合德富與地平侔貴窮變化之理盡神明之數伏羲畫卦唯觀鳥獸之文黃帝垂衣蓋取乾坤之象利兼於成器功周於備物瑤臺美化闡邦國之風猷銀榜嘉聲茂君親之典禮稱才子者八族則叔獻季狸有亂臣者十人則太顛閎夭若夫圓邱方澤所以饗天神地祇複廟重檐所以序文昭武穆命秩宗之位分太宰之官考虞夏之質文定殷周之

損益其大禮有如此者高陽有飛龍之樂始會八風帝舜有儀鳳之音初調九奏后夔典其教制氏辨其聲鐘磬等瑟致其和尊卑長幼成其序其廣樂有如此者太微營室明堂布政之宮白虎蒼龍象魏懸書之法下應猶草王言如絲北辰而拱眾星南面而朝天下其爲政有如此者糾萬人者施以八刑詰四方者戒之三典畫衣不犯載酒無冤免禽獸於網羅納寰瀛於軌物其恤刑有如此者周人之養國老始闢西膠漢氏之召諸生初開太學辟雍所以行其禮泮宮所以辨其教童子三



尺羞談霸后之臣冠者六人惟述明王之道其文德有  
 如此者涼風至司馬於是乎陳兵太白高將軍於是乎  
 宜戰乘斗杓而誓旅出星門而杖鉞莊周稱天子之劍  
 舉之按之呂望言聖人之兵如風如雨其武功有如此  
 者稽其殷令一作室有文犀利劍之效珍考其周書有茲  
 白乘黃之騁力東漸西被南馳北走盧敖之窮觀六合  
 不出於城隍陶侃之飛入八門未游於仙室其疆理有  
 如此者察璿璣而孚大運天迴地游吹玉律而部人時  
 陽動陰靜烟雲蕭索而合彩日月淑清而啟旦豈直鳳

巢阿閣入軒后之圖書魚躍中州一作舟

一作舟

稱武王之事業

其休徵有如此者然則囊括混沌發揮生靈大庭不足  
 使驂乘驅連不足使扶轂可以會玉帛可以答靈祇行  
 聖人之大孝既郊祀而宗祀昭帝王之盛節亦因天而  
 事天猶復下聽輿人旁求故實以為唐堯五載無聞太  
 室之儀殷帝八遷未卜王城之地是用陳圭置臬建周  
 后之兩都詔蹕鳴鑾巡漢王之中嶽熒惑先列招搖在  
 上隱天雷風相薄道伊闕據轅轅怡然肆望邈乎周覽壯靈山



之雲雨仍求載祀之經對閒寢之邱墟思秩無文之禮  
於是降天渙命司存因其舊跡葺其新廟詳費務議工  
徒下隴蜀之名材致荆藍之寶玉易者言乎悅使人忘  
其勞詩者歌乎子來成之不日東西轆轤南北崢嶸繡  
栴兮雲楣光照耀兮奪目桂棟兮蘭橈氣氛氲兮襲人  
皎日登於綺疏奔星下於閨闈珠簾璫匣上高閣而三  
休金柱銀楹步長廊而中宿窮山海之瓊寶盡人神之  
壯麗豈止河庭貝闕俯瞰馮夷之都洛水瑤壇旁臨處  
妃之館爾其巖嶂重複岡巒左右青霞起而照天白露

生而市地餘基隱嶙仍知萬歲之亭古木摧殘尚辨三  
花之樹明公舊祀棟宇岌堯仙女層臺風烟爛漫軒轅  
之訪大隗先求牧馬之童太乙之徵少君直下乘龍之  
使夫峻極也天帝因而會昌夫降神也景福由其興作  
於是乎昭之以明德聽之以和聲可以羞澗溪沼沚之  
毛可以奠潢汙行潦之水聰明正直惟鬼神而有知玉  
帛犧牲實陳信而無愧日之吉靈之來蛻爲旌兮翠爲  
蓋雷爲車兮電爲策鼓之以南箕風嫋嫋而先路潤之  
以西畢雨冥冥而灑道其始至也若海靜山空曠曠曠



曦照白日於扶桑之東其少進也若移星轉漢燦燦爛  
爛吐明月於瀛洲之半佩珠璣而玗璠襲羅縠而飄颻  
建晨纓之寶冠踐遠游之文履命儔兮嘯侶徒倚兮徘徊  
羣仙畢集眾靈咸至有西華之紫妃有中黃之素女  
華山之上明星遠燭陽臺之下暮雨潛通或瓊室以飛  
霞或銀臺而薦樂天孫忽降暫停支石之機神女相歡  
卽起投壺之電左侍右衛則甲申之瓊石乙巳之蘭蕭  
妍倡妙妓則憑悅之清歌幽靈之鼓瑟樂章旣闋禮容  
斯備迴風兮雲旗入不言兮出不辭荷衣兮蕙帶倏而

來兮忽而逝惟神享德降百福而無疆惟嶽配天視三  
公而有典昔者夏后氏之乘四載會開宛委之圖周穆  
王之御八龍猶紀弁山之石况乎上照下漏天平地成  
人主宅中旁羅於宇縣山靈顯位密邇於神州豈使令  
德不傳頌聲無紀由是三天降策有南霍之叔一作儲  
八丈鐫銘有西王之服道魏國鍾繇之字惟勒歲年晉  
家張載之文遂承明詔其詞曰

上帝有命皇天無親樹之元后以牧烝人光宅六合懷  
柔百神德成郊祀禮備宗禋其一軒稱配永岷墟帝出堯



號則天汾陽詔蹕觀人設教協時同律有感必通無文

咸秩其二皇家啟聖受命於天上鍊五色旁疏百川開階

運斗宅海乘乾王母益地周公卜年其三天子建德重規

疊矩聖敬日躋宗文祖武範圍三極和平萬宇率由舊

章粵若稽古其四璇宮夜敞銀榜朝開德象陰月聲符震

雷山河翼戴星緯鹽梅能事畢矣乾元大哉其五治定制

禮功成作樂日月旂常夏殷正朔德澤天外交明地角

氣白星黃風搖露濁其六兩京畿甸五載巡遊驅馳太乙

部列蚩尤將見大隗爰尋許由迴鑿躑躅寓目周流其七

鬱鬱靈鎮巖巖積石直上五千去天三百帝休非遠真

經可覲石室徘徊瓊膏滴瀝其八山惟地德神即陰靈瑤

姬逐雨玉女隨星陰陽不測黍稷非馨倏忽年代荒蕪

廟庭其九旁求祀典載垂天渙始詔林衡俄成壯觀紫稅

星錯丹梁霞煥似對青溪如遊白岸其十文狸赤豹電策

雷車隱隱中道旬旬太虛遂停龍駕永託神居天迴地

止霧歇雲除其十一眾靈睽賜羣仙容與衡岳夫人海濱

游女洛川解佩天河弄杼顧慕招攜續紛儔侶同氣同

聲爰笑爰語其十二于以采蘋南澗之濱于以采藻于彼



行潦日吉兮辰良浴蘭湯兮沐芳揚  
枹兮拊鼓奠桂酒

兮椒漿神其萃

一作醉

止降福穰穰

其十三

銘

梓州惠義寺重閣銘

並序

大辰之歲正陽之月有鄆縣宰扶風竇兢字思睿昭宣  
令德光闡化猷庶政惟和萬人以理閒庭不擾退食自  
公遠覽形勢虔心淨域乃與禪師釋智海忘言契道寓  
目於長平之山援飛莖陟峭嶒削成千仞壁立萬尋俯  
觀大道僅如棗葉下望須彌裁同芥子飛流滴瀝而成

響喬樹璀璨而垂榮玉堂石室千門相似壁殿珠臺十  
方皆現慷慨榱桷之未立吁嗟棟宇之莫脩不捨有為  
取諸大壯觀夫左龍角右參旗前太微後營室駢羅列  
以雜沓瑟瑟蕭條以清冷上磊落以晃朗下泓澄以靉黷  
參參差差森森纒纒千楹萬拱乍合乍離禕禕粲粲絢  
絢煥煥六采五章或同或散莽如天覆蠹以雲平金火  
合舍於垂珠日月相望於銜璧璇墀鈿砌平接太階玉  
戶金扉俛臨閭闔曳紅日舒丹霞豐隆為雷砰鏗訇於  
軒檻列缺為電翕矐霍於庭除寒暑隔闕於墻垣虹霓



迴帶於廊廡仰之不極目炫炫而喪精登之無階心遑  
遑而失度若士翔九垓之表仍不逮於上榮大章窮四  
海之間猶未離於前城借如梵天之闕釋帝之宮兩曜  
城池五雲樓觀輪王所處純金爲說法之堂諸佛所遊  
眾香作經行之地亦未可同年而語也夫黃金鏤勝曾  
不若四攝之門青石爲牆曾不若三空之地殫百工之  
力建七寶之樓豈徒然哉良有以也故如來神力且觀  
嚴淨道師方便化作一城事有古而可質於今言有大  
而可徵於小是則毘耶四會俱發道心險路眾人咸知

寶所銘曰

長平山兮建重閣上穹隆兮下磅礴紛被麗兮駢交錯  
巖色相兮沖寂寞誰所爲兮天匠作

表

爲劉少傅等謝敕書慰勞表

臣某等言司馬郎中王知敬至伏奉今日日手詔璿璣  
下照觀天象之三光玉檢前開見河洛之八卦發揮圭  
璧感召風雲不知手之舞之足之蹈之者也臣等稽之  
天地明山闢長男之宮步之日星樂府奏重光之曲三



王所以立教者天子爲先萬國所以稱貞者元良是寄  
伏惟天皇御中道踐平階對揚文武之休命紹述古先  
之大業洛京朝市義協於省方秦地山河事資於監守  
皇太子一物三善四方繼明孝以承親顯於直城之路  
明以照下驗於長壽之街虔奉絲綸躬親政事德刑詳  
矣旣遠安而邇肅博愛先之亦塗歌而里詠固以禮成  
恭敬道洽温文知寶歷之無疆信蒼生之幸甚臣等竊  
循愚蔽謬荷恩私或位聯輔弼或職在台衡希少陽之  
末光自韜螢火洽重海之餘潤已息牛涔不謂殊獎曲

覃真文俯及載之眉首奉以周旋聽葛天氏之歌方慙  
此慶聞有虞氏之石未均斯喜但知懷璧之罪不可越  
鄉豈敢貪天之功以爲己力傾誠每積候朱鳥於南宮  
拜德無由限蒼龍於左闕臣無任云云

議

公卿以下冕服議

古者太昊庖犧氏仰以觀象俯以察法造書契而文籍  
生次有黃帝軒轅氏長而敦敏成而聰明垂衣裳而天  
下理其後數遷五德君非一姓體國經野建邦設都文



質所以再而復正朔所以三而改夫改正朔者謂夏后氏建寅殷人建丑周人建子至於以日繫月以月繫時以時繫年此則三王相襲之道也夫易服色者謂夏后氏尚黑殷人尚白周人尚赤至於山龍華蟲宗彝藻火粉米黼黻此又百代可知之道也今蕪知機表奏請立節文改章服奉付禮官學士詳定是非者謹按虞書予欲觀古人之象日月星辰山龍華蟲作會宗彝藻火粉米黼黻絺繡由此言之則其所從來者尚矣夫日月星辰者象聖王光照下土也山者布散雲雨象聖王澤霑

下人也龍者變化無方象聖王應時布教也華蟲者雉也雉身被五彩象聖王體兼文明也宗彝者虎也雉以剛猛制物象聖王神武定亂也藻者逐水上下象聖王隨代而應也火者陶冶烹飪象聖王至德日新也粉米者人恃以生象聖王爲物之所賴也黼者能斷割象聖王臨事能決也黻者兩已相背象君臣可否相濟也逮有周氏乃以日月星辰爲旌旗之飾又登龍於山登火於宗彝尊神明也於是乎制衮冕以祀先王也九章者法陽數也以龍爲首章衮者卷也龍德神異應變潛



見表聖王深識遠知卷舒神化也又制鷩冕以祭先公也鷩者雉也有耿介之志表公有賢才能守耿介之節也又制毳冕以祭四望也四望者嶽瀆之神也虎雖者山林所生明其象也又制絺冕以祭社稷也社稷者土穀之神也粉米由之而成象其功也又制元冕以祭羣小祀也百神異形難可遍擬但取黻之相背昭異名也夫以周公之多才也故治定制禮功成作樂夫以孔宣之將聖也故行夏之時服周之冕先王之法服乃此之自出矣天下之服能事又於是乎畢矣今表狀請制大

明冕十二章乘輿服之者謹按日月星辰者已施於旌旗矣龍山火米者又不踰於古矣而云麟鳳有四靈之名而元龜有負圖之應雲有紀官之號水有盛德之祥此蓋別表休徵終是無踰比象然則皇王受命天地與符仰觀則璧合珠連俯察則銀黃玉紫盡南宮之粉墨不足寫其形狀罄東觀之鉛黃無以紀其名實固不可畢施於法服也雲者從龍之氣也水者藻之自生也又不假別爲章目也此蓋不經之甚也又鷩冕八章三公服之者鷩者太平之瑞也非三公之德也鷹鷩者鷩



鳥也適可以辨刑曹之職也熊羆者猛獸也適可以旌武臣之力也又稱藻爲水草而無法象引張衡賦云帶倒茄於藻井披紅葩之狎獵謂爲蓮華取其文彩者夫茄者蓮也藻者飾也蓋以蓮飾井非謂藻爲蓮若以蓮代藻變古從今旣不知草木之名又未達文章之意此又不經之甚也又毳冕六章三品服之者按此王者祀四望服之名也今三品乃得同王之毳冕而三公不得同王之衮名豈惟顛倒衣裳抑亦自相矛盾此又不經之甚也又黼冕四章五品服之者考之於古則無其名

驗之於今則非章首此又不經之甚也國家以斷鼉鍊石之功今上以緯地經天之德漢稱文景周曰成康講八代之樂蒐三王之禮文物旣行矣尊卑又明矣天下已和平矣萬國已咸寧矣誠請順考古道率由舊章弗詢之謀勿庸無稽之言勿聽若夫禮惟從俗則命爲制令爲詔乃秦皇之故事猶可以適於今矣若夫義取隨時則出稱警入稱蹕乃漢國之舊儀猶可以行於代矣亦何取於變周公之軌物改宣尼之法度者哉



楊盈川集卷五

番禺沈葆和初校  
番禺陶福祥覆校

楊盈川集卷六

神道碑

後周青州刺史齊貞公宇文公神道碑

惟黃帝大電之精以太清而張樂惟高辛招搖之象以  
人事而紀官於是乎生我司徒敬敷五教翼贊虞帝而  
咸熙庶績惟殷湯受天明命以統九有之師惟微子崇  
德象賢以為萬邦之式於是乎生我丞相約法三章光  
輔漢室而威加四海大齊宣皇帝商周之日號西伯以  
稱臣太祖高皇帝堯舜之朝避南河而革故司空臨川



獻王懿親明德論道經邦中庶子平樂侯開國承家丹  
書白馬於是平生我齊貞公惟魏之寶惟周之幹開上  
帝而格天地變陰陽而平水土詳求典載歷選台衡或  
大澤而康帝圖或高邱而濟王業諸侯五百伊尹出於  
庖廚甲士三千太公起於屠釣未有土從軒后下及全  
齊聖主明君三居域中之大帝師王佐累及人臣之重  
古所謂歿而不朽者抑斯之謂與公諱彪字明俊蘭陵  
人也卽宣帝之元孫高帝之曾孫臨川王之孫平樂侯  
之子稟神河岳藉慶王侯攀兩曜之末光乘五行之秀

氣溫厚廉讓當時以爲達人宣慈惠和天下謂之才子  
屬三方鼎立九土星分祿去公朝失諸侯之盟會政由  
梁國建天子之旌旗士女同嘆於商墟鬼神共謀於曹  
社公杜門屏迹心不自安與門生故吏數百人歸於後  
魏宣武皇帝以客禮待之詔除給事中假龍驤將軍正  
光五年兼彭城府長史假節則將軍比於王濬優禮則  
長史兼於杜襲龍驤可畏晉后任之於渡江騏驎不乘  
魏氏託之於留府六年除通直郎散騎常侍中書侍郎  
永安三年帝北巡遷撫軍將軍銀青光祿大夫散騎常



侍散騎通直起於天興之元中書侍郎始自黃初之代  
宣威撫軍之號僕射光祿之名奇才總於文武重任歸  
於將相徐方叛逆以公爲行軍長史兼統別部仍加鼓  
節彭城宋邑海岳徐州嶧陽孤桐羽畝夏翟昔稱都會  
今實邊陲魯伯禽始得專征周穆王遂行天討公手執  
旗鼓入侍帷幄以陶侃部分之明當阮孚戎旅之重有  
如荀羨獨負逸羣之才不學江道空有連雞之喻徐州  
平遷黃門侍郎揚州大中正黃扉藹藹青瑣沉沉有若  
張公之萬戶千門博觀圖籍太湖爲浸會稽爲山有若

荀勗之十郡一州註藻人物累遷大司農秦稱內史漢  
曰司農管夷吾陳不涸之名耿壽昌立常平之議時播  
百穀后稷讓於虞書阜成兆民列卿拜於周典普泰元  
年遷車騎將軍加右光祿大夫永熙二年出爲潁川太  
守地稱汝潁俗尙申韓有鄭伯之別都有周公之朝邑  
教之德化無囚歷於八年任於賢能旁潤踰於九里於  
時齊武王居中作相實有遷鼎之謀周太祖在外持兵  
深懷事君之道昭公失位由季氏之執權襄王出居成  
晉文之霸業三年秋八月武帝幸長安以義兵從順大



三鄒氏刊  
統元年授開府儀同三司封靈璧縣開國子邑三百戶  
金隄石印清濟濁河爰賜土田以爲藩屏漢之宰相始  
開封邑周之列侯實兼卿士二年拜車騎大將軍九年  
遷五兵尙書十年遷中書監領驃騎大將軍加開府儀  
同三司進爵爲公增邑一千戶天子有詔不入軍門匈  
奴未滅不營私第蔡謨兼五兵之署鄧騭比三台之儀  
掌中書之綸翰加上公之冕服十六年遷侍中驃騎大  
將軍以下並如故昔惟常伯今則侍中切問近對拾遺  
補闕冕旒無象先問顧和玉佩不存卽徵王粲廢帝後

二年公不賀出爲使持節華州刺史侍中並如故桃林  
國邑大荔城隍三秦六輔之奧區五嶽四瀆之襟帶倪  
寬之爲內史惟事漑田薛宣之守馮翊但知拱默尋加  
特進餘如故官品第一朝廷所敬辟吏如五府之間班  
列在三公之後唐虞之繼文德也稷契謨明於兩朝魏  
晉之順大名也裴王建功於二代周武成三年進封青  
州齊郡公邑二千戶賜號東岳先生詔曰堯有四岳朕  
惟公一人賜雜彩二千段甲第一區雍州良田百頃其  
優禮如此堯命羲仲星鳥嵎夷之官周賜姜牙穆陵無



棣之境三王不襲同盟固於泰山百代相因舊國傳於負海惟保定四年公薨於長安私第天子罷朝羣臣赴弔喪用官給嗚呼哀哉五年贈少保使持節揚光桂三州諸軍事揚州刺史諡曰貞公禮也公少丁外艱州黨稱其孝齊武皇帝見而嘆曰可謂吾家曾閔外祖太尉公王儉謂其子侍中騫曰成汝宅相者在此孫乎公之北歸也後魏宣武帝勅曰昔微子去殷項伯歸漢卿又得之於今公泣涕橫流跪而對曰臣家國不造鼎祚淪亡進不能匡正退不能死節今復託身有道何敢比德

古人帝益重之及周太祖作相西朝于侯之下皆望塵而拜公與之抗禮太祖尤相敬待屢有咨詢嘗曰國家之子房也公體淳和之至性負廊廟之大才孝通神明忠定社稷馬伏波來遊二帝晏平仲能事百君在魏則賈詡荀攸在周則太顛闕天惟司徒克慎厥始惟丞相克和厥中惟公載德克成厥終三后同其政道子孫訓其成式輝光助於日月積德廣於宇宙以某年月葬於某原國遷三代年移十紀杜當陽之碑石沈漢水而無聞仲山甫之鼎銘入匈奴而不出曾孫皇朝右金吾將



軍同州刺史得照宏才大節玉振金聲入當天子之右  
 軍出臨帝京之左輔承積善之餘慶襲大宗之不遷願  
 述家風思傳祖德是用勒銘刻石相質披文載於景鐘  
 大夫稱伐之義書於太常諸侯計功之道追題瓦屑鄭  
 康成北海之門重刻碑陰張平子南陽之墓其詞曰  
 黃帝攝政勤勞耳目居於軒轅戰於涿鹿咸陽黜夏登  
 壇受福表正萬邦纘禹舊服其逮乎微子周之國賓降  
 及蕭叔宋之懿親高祖丞相王迹是因宣皇御史社稷  
 之臣其二大陰所立皇齊誕聖既創元基仍集大命謀孫

翼子重熙累盛天祿永終南風不競其三惟公載誕克嗣

家聲千丈多節三年一鳴待時而動以族而行才歸晉

國璧入秦庭其苻堅拜首降天之使陶豫策名勤王之

事任隆起草榮高近侍赫奕禁門雍容貂珥其日暮青

瑣夕郎之職法駕畢陳黃門次直帝王之盛誠在農殖

如京如坻我黍我稷其吳王舊國採山鑄錢公為中正

佩以韋絙夏禹遺跡今來賴川公為太守示以蒲鞭其

齊稱東帝周稱西伯諸侯謀王天子下席公之忠義如

彼松柏其發自新邑歸於陸海魏德雖衰天命未改功



成晉鄭為而不宰寵茂山河於是乎在其九亞夫真將去

病元勳持兵對揖絕漢行軍尚書武庫抑有前聞侍中

重席曾何足云其十當塗遜位有周經野二國唐虞兩朝

裴賈出守馮翊人無訟者受封於齊實匡天下其十一晨

占赤烏夜辨黃熊曾參易簣期於令終子囊城郢歿有

遺忠明君輟朝羣臣會同其十二黃屋左纛輕車介士朝

發桐鄉暮歸蒿里積善餘慶由來尚矣公侯子孫必復

其始其十三

後周明威將軍梁公神道碑

蓋聞君為元首臣作股肱或論道三槐或折衝千里至

有道存俎豆藝總干戈高視翰墨之英猶布爪牙之旅

究青編於學府業有多聞受黃石於兵符算無遺策故

得九功咸敘七德攸彰文武不墜公實兼美公諱待賓

安定臨涇人也竦以英才遠邁知州縣之徒勞鴻以抗

節遐征覽帝京而有作由是五噫標興播金石而騰徽

七貴承榮縮銀黃而壘茂貞規盛烈映史疑圖粗紀詠

歌無俟詳確高祖禦後魏駙馬都尉侍中少保金紫光

祿大夫揚州總管贈太尉謚昭公食邑二千戶銀榜增



輝玉壺流渥位隆三少化浹五胥旣而幽壟埋魂終降  
槐庭之贈高門納駟式居茅社之封曾祖睿宇文周駙  
馬都尉鄜秦二州總管光祿大夫兵部尙書隋益州總  
管蔣國公贈司空食邑三千戶白水時清乳虎之謠行  
息祿符垂異一作光祿垂翼扣馬之諫必申加以主西序之羣  
英名高八座遵文翁之遺訓學富三巴茂先榮級忽光  
泉壤漢祖寵章永有帶礪祖演隋沙州刺史上柱國公  
踐仲寧之餘躅奸邪斂手簽孝仁之遠踪羣胡革面連  
州跨郡邁陶氏之隆基開國承家掩張門之累葉父贊

隋左千牛備身驪山府上騎柱國皇朝豐王府諮議雲  
州司馬冀州長史蔣國公龔良弓於簪笏榮侍紫宮翼  
雕戟於巖廊肅趨丹地西園坐讌侶明月而飛文北土  
行康望浮雲而展足公漸潤膏腴發靈川嶽七年可識  
抱杞梓而呈才千里見知負騏驥而騁駿靈臺遠鑒與  
霜月而齊明智府宏深共烟波而等曠踐仁義於區域  
白璧已輕許然諾於樞機黃金豈重因心孝友宜於自  
然率志謙沖得乎所性不脂韋而求達不詭計而自媒  
被玉軸之文章三冬遠足窮金壇之祕訣百戰不孤譽



滿寰中聲蓋天下而學優將仕允屬名家欲昇鴻漸之  
姿終佇鶴鳴之聞以皇朝麟德二年補左親衛從資例  
也屬金甲出戰玉帳論兵從命文皇問罪遼碣公提戈  
赴海投筆從燕智者有謀仁者必勇孤鋒直進九種於  
是克清匹馬橫行三韓由其殄滅酬庸賞最我有力焉  
俯洽恩波泛承勳級卽授上柱國公深慚位薄命舛數  
奇雖霑勒石之勳未展披堅之效嗟乎揚子雲之才藻  
空疲執戟馬相如之文詞猶勞武騎今古同貫夫復何  
言旣而從牒隨班牽絲祇務起家拜朝議郎永淳元年

正月三十日授伊州伊吾縣丞非所好也路指金河途  
連玉塞塵沙共起烽火相驚秋草將腓胡笳動吹寒膠  
欲折虜騎騰雲公佐佑多方掌司攸寄服叛懷遠擒奸  
擿伏於是寇敵不敢窺邊歌頌因茲溢境曾未期月政  
令大行特簡帝心超居不次永淳二年二月四日制授  
昭節校尉守右衛蒲州府佐果毅仍令長上兼上陽洛  
城等門供奉公洞曉戎章妙詳兵律軍國是賴戎幕允  
歸由是徼道長巡嚴局每奉朝求夕警不怠於風霜善  
牧能防更申於閑阜其年十月七日奉勅命於大內祥



麟廐檢校馬公識高東野職參西極勵銜策而追風逐日加翦拂則絕電奔星馱馱將駟騾齊衡驥騮共駟駟伏櫪於是龍媒間出麟友挺生伯樂多謝於精微日磧有慙於牧養恩制褒獎又加崇秩文明元年二月二十日遷游擊將軍仍依舊長上大周革命兩儀開闢爰覃作解之恩式暢惟新之典勤勞夙著體望允歸拜職遷榮實符僉議天授元年九月十六日加威武將軍守五王鈐衛翊善府折衝都尉依舊長上封安定縣開國男食邑三百戶公祇奉王庭職司兵衛八屯由其增峻五

校於是克宣翼翼兢心積劬勞於歲月勤勤忠志懷跼踣於序時憂能傷人竟成沈疾以長壽二年正月六日終於神都旌善里私第春秋五十惟公弱不好弄卓爾不羣九歲明詩七齡通易月初能對卽習黃童日下相酬還慙夫子經耳不忘歷口不遺性沈深有器度能侗儻無拓落尤重交友雅愛林泉月幌風襟每吟謠於牋絲花新葉早必賞會於琴樽加以啼猿落鴈之奇鸞驚鳳翥之妙瀉水懸河之辯背碑覆局之精標映前哲公實多敏至孝過人雍和絕俗事父母則造次不違友弟



兄則溫柔必盡既風樹與感霜露纏悲聿修之德惟新  
欲報之恩罔極虔誠大象宏誓小乘廣樹慈仁庶憑因  
果月抽官俸日減私財並入薰修咸資檀施故得雕檀  
之妙俯對禪龕記葉之文式盈梵宇粵以大周長壽二  
年歲次癸巳二月辛酉朔二十四日甲申遷窆於雍州  
藍田縣驪山原舊塋禮也葬事之屬一皆官給鼓吹儀  
仗送至墓所墳開白日終留恨於隣城禮被皇家忽霑  
榮於霍隧嗚呼哀哉嗣子左千牛去疑哀纏泣柏思結  
餐茶仰庭禮而不追觀楹一作書而增慕恐元宵倚杵

碧海成桑敬勒貞堅乃爲銘曰

大哉嬴國遠矣少梁與秦同祖今則夏陽爰暨伯翳胙  
土惟良自茲厥後人物克昌逮乎漢朝令望不已三世  
連輝七侯承祉或顯或晦有文有史烏奕珪璋芬芳蘭  
芷少保名揚司空道泰惟祖惟禰蟬聯軒蓋挺生令則  
在邦之最卅歲騰芳髫年超靄君號神童晚稱英傑佩  
仁服義旣明且哲七步立成五行不輟家惟萬卷韋實  
三絕詞高許下學富淹中志惟謹潔心亦沖融溫淳植  
性朗潤在躬閭門禮洽朋友財通思若雲飛辯同河瀉



兼該小說邕容大雅武擅孫吳文標董賈樹下啼猿封  
中試馬且文且武執戟登位海隅不賓命我偏帥既陪  
勒石還從飲至輔翊百里褒昇佐貳既總兵權入司宮  
掖微道宵警禁門曉闢式重其駿載懷斯癖我馬既良  
我軍既雄折衝千里趨奉九重行承芝詔坐啟茅封恨  
深負米榮暨擊鐘爰持戒律思答慈容將福有徵謂仁  
必壽如何淑德遭此凶咎孺慕崩心惇嫠宿首夜泉扃  
開天長地久

唐同州長史宇文公神道碑

諸侯計功其銘曰仲山甫式於百辟大夫稱伐其銘曰  
正考甫恭於三命所以揚其先祖所以示其子孫上古  
之初刊於禮樂之言中年以降述於宗廟之碑文質既  
殊源流遂廣山河永配金石長存或旌原氏之阡或表  
滕公之墓觀百林之字者孝廉之舊業於是乎不愆不  
忘讀黃鳥之詞者文範之餘風於是乎可久可大公諱  
挺字叔珉河南洛陽人也宇文歸之遠派宇文翰之餘  
秩燭龍晝夜於鍾山鵬雲南北於溟海自中州圯圻上  
國崩離魏氏忘其寶圖齊人弄其神器則天有成命周



雖舊邦文王以業重三分昭事上帝武王以功成八百  
陰隲下人車書混一於域中子弟星羅於海內方乎劉  
澤乃天漢之懿親匹以曹洪卽當塗之近屬及其隋室  
遷鼎唐運握符固亦壇社仍存山河不替曾祖顯和後  
魏冠軍將軍朱衣直閣東夏州刺史車騎將軍散騎常侍  
長廣郡公周贈使持節開府儀同三司延丹綏三州諸軍  
事延州刺史周書有傳對揚天命保乂王家霍去病初  
封冠軍周亞夫始爲車騎剖符之重任在於六條建國  
之榮禮高於五等祖神舉使持節驃騎將軍開府儀同

三司京兆尹柱國大將軍并潞肆石四州十二鎮諸軍  
并州總管東平郡公贈少保周書有傳材優輔弼業贊  
雲雷誓則羊祜儀同楚則若敖柱國王章之拜京兆天  
子聞其直言郭伋之蒞并州諸童符其恩信考誼一作父孝

誼隋文皇帝挽郎皇朝益州青城瀛州清苑二縣令鈞  
深致遠直道正詞不汲汲於富貴每乾乾於日夕廣都  
蔣公琰非無社稷之能太邱陳仲弓自有閨門之德公  
慶成弧矢氣襲芝蘭劔則赤山之精照牽牛於北斗鼎  
則黃雲之寶入天駟於東方資大孝而立身蘊中和以



成德詞參變化稽百代之闕文學富圖書閱三冬之舊  
史司徒袁粲許之以栝柏豫章處士彌衡目之以椅桐  
梓漆初任國子生擢第授道王府參軍兼鄭州參軍事  
橫經太學射策王庭高陽才子宣慈惠和之譽武公新  
邑濟河洛頴之間兼攝務殷參卿位重王徽之任達國  
士升車劉簡之博聞中郎寓直秩滿授遂州司戶參軍  
事天開并絡地洩江源才雄翕習於外區棟宇相望於  
近甸尹興爲政知陸續於眾人黃讜臨官識包咸於數  
子尋遷絳州翼城令大梁星野少澤封圻城故絳以深

其宮都新田以流其惡實性繁劇載著循良魯國有司  
無擅徵之事南陽郡吏罷休沐之娛州府狀聞鄉亭頌  
德亦由禮讓之化綿竹於是乎作歌風俗之夷浚儀於  
是乎刊石稍遷符璽郎尋奉勅檢校鴻臚本官如故環  
濟要畧掌天子之符璽劉熙釋名表京師之心腹是分  
麾節式贊王侯國信不差郊迎有序遷尚書職方員外  
郎夏書禹貢辨其川澤周禮職方明其物土清晨伏奏  
幾承題柱之恩閒夜潔齋惟有張燈之宿詔除朝散大  
夫晉州司馬尋遷長史平陽舊縣姑射靈山玉印仍存



瑤城未改習鑿齒之逢宣武三命而踐侍中管公明之  
謁冀州四見而登別駕詔遷同州長史河西輻輳渭北  
膏腴秦地之下邦漢京之左輔使君何以爲政端右宜  
其得人江統知賢直言則陳留阮宣子唐林薦善通理  
則汝南黃叔度王祥糾合屈公輔之宏材荀羨逸羣壯  
冲天之勁翮享年六十有五以永淳元年六月二十一  
日終於華州之別業嗚呼哀哉公元亨利貞文行忠信  
禮樂之君子儒林之丈夫當在顏冉中求自是風塵外  
物友于之義伯淮與季江同寢朋從之道鮑叔與管仲

推財優游大學之中藉其平臺之下輜車就列化洽於  
二州油軾當官政成於半刺道尊德貴而大位不躋有  
志無時而天年不永卽以其年十月遷窆於鄭縣安樂  
鄉之西原嗣子某官等詩禮預聞箕裘早學生則盡其  
養劉殷積粟於七年歿則致其哀唐頌絕漿於九日占  
白鶴相青鳥鄭伯所封有咸林之采地晉侯所賂有河  
外之城邑其川渭水而玉璜其鎮華山而金石習習旃  
旒紛紛野田范巨卿則素車來哭韓元良則總麻設位  
大夫受梁鴻之命終陪烈士之墳妻子從田豫之言竟



托神人之墓嗚呼哀哉銘曰

國自東部承家北平遂荒中縣奄有神京時逢日薄運

改天正二王之後三代之英其一惟宗惟祖有典有則大

魏將軍隆周柱國於穆顯考其儀不忒禮樂宣風閨門

表德其五才鍾秀百福與賢蜀都會子漢代顏淵公之

廣學其積如山公之大辯其流如川其三親則郝霍地居

周鄭人物會同歌謠鼎盛設官分職天子有命束髮登

朝參卿軍政其四江漢之表河汾之都禮優縣楊任重前

樞六璽為貴皇天降符九州為廣益地開圖其五平陽守

土下部風俗秦晉閭閻山河軌躅緹油之化海沂之曲

始聽雞晨行復驥足其六邇長筮短吉往凶來賓朋永訣

徒御相哀華館無象元堂不開青龍水曲白馬車迴其七

漠漠古墓槭槭寒桐郭門之路平林之東天光少日地

氣多風凡生物而必死唯君令始而善終其八



楊盈川集卷六

楊盈川集卷七

神道碑

唐恒州刺史建昌公王公神道碑

王氏之先代為佐命秦之霸也則王離滅楚國而三將  
連衡漢之興也則王陵誅項籍而五侯同拜南陽克定  
應圖讖而作司空西晉聿興合歌謠而濟天下昔者伊  
尹伊陟但保父於商朝太公桓公惟夾輔於周室蕭何  
之後居食祿而無聞鄧禹之孫在當塗而不嗣未有夏  
殷三統金木五遷冊命重光軒裳代襲則我瑯琊之郡



有冠蓋之里乎建昌之縣有公侯之子乎公諱義童字元稚其先瑯琊臨沂人也永嘉之末徙於江外皇運之始遷於五陵今爲雍州萬年人也祖僧興齊會稽令梁安郡守南安縣開國侯祿位千石珪符五等營室迴於羽儀山河入於盟誓父方駮梁正閤主簿伏波將軍梁安郡守隋上儀同三司以惠和之德有文武之才伏波將軍從征等於馬援儀同三司開府均於鄧騭家餘積慶郡不乏賢代臨本州則元賓之父喜形於色繼爲太守則張翕之子迎者如雲自齊國遜位於梁庭及隋人

內禪於皇室夏禹之鼎寶命集於周朝御龍之家世祿歸於范氏公台階茂緒昴宿精靈五百歲之賢才一千里之皇佐忠規武節學府詞林元方闡門敬其有德少游鄉里稱其善人實惟清廟之器是曰皇家之寶韻諧金石奏虞廷之八音德合珪璋列塗山之萬國黃河一曲之水莫測其源赤城千丈之巖未階其峻羣童忽聚綴帛而引旛旗父老相呼授履而傳兵法隋授左勳衛率非其好也河東離析海內風塵天子溺於膠船諸侯問於金鼎能扶天下之危者必據天下之安能除天下



之憂者必享天下之樂我高祖神堯皇帝就之如日望  
之如雲發三河之雷電平四海之歷象武王之仗黃鉞  
一月臨於孟津高帝之執朱旗五星聚於東井公瞻烏  
於屋射隼於墉陳平則間行而去楚酈生則長揖而歸  
漢奉符繫組觀軹道之降王偃武脩文見山陽之散馬  
初拜車騎將軍稍遷右屯衛將軍錄有功也考於周典  
崇德報功稽於春秋策勲命爵車騎萬隊備涼土之羌  
戎衛軍千兵掌京師之屯禁於時天下初定邊方未輯  
二十八舍尚有吳越之妖氛一十三州猶積東南之殺

氣武德四年詔公爲江南道招討使鼓琴而送受命而  
行乘使者之輜車掌行人之旌節陸賈至於南海先責  
尉佗隋何入於九江卽徵黠布詔除泉州都督封建昌  
縣男食邑三百戶斗牛星象舜禹精靈境接東甌地隣  
南越言其寶利則璫珠璣敘其風俗則丹雞白犬門  
容駟馬位列三刀防蕙苾之譏嫌絕簡書之流謗豈直  
廣州清節酌貪泉於石門合浦神君返明珠於漲海貞  
觀三年詔遷散騎常侍行果州刺史授期天帝肇跡人  
皇南究國之舊都西宕渠之古邑岡巒紛糾天彭雙闕



而作門珠貝浮沉巴水三迴而成字公入參師友出居  
方伯金蟬右貂朱旗曲蓋纔臨蜀郡卽聞來暮之歌初  
踐益州已聽中和之樂七年詔遷銀青光祿大夫行恒  
州刺史西街畢昴北嶽恒山天開太一之宮地列并州  
之鎮境分靈壽魏將樂羊之所封邑對行唐趙王惠文  
之所築公政成期月風行萬里鄧晨一郡漢帝稱爲主  
人李廣數年匈奴號爲飛將行嘗計日郭伋不負於童  
兒郡異中平王觀無私於任子旣導德而齊禮亦勝殘  
而去殺三禾在殿將拜鄭宏兩鴈隨車坐悲虞國享年

若干以十五年冬十一月二十五日薨於洛陽之清化  
里公家傳將相世有忠貞屬離亂之宏多值風雷之草  
昧河宗兩日負鼎而謁成湯渭水七年垂釣而逢西伯  
將軍再命刺史三遷種暲樂巴牧人之良翰龐參虞詡  
將帥之宏規立事於當年揚名於後代兄國印穀州刺  
史弟國稀仁州刺史荆枝擢秀棣萼生光何止平輿之  
二龍是爲賈家之三虎唐虞之際四岳分居趙魏之間  
八男爲郡公雖勳參締構位總班條金友玉昆良田廣  
宅而能吐食下士倒屣迎賓無笑客之美人有拜賓之



童隸策名委質善始令終生當封侯克成丈夫之志死而可作無忘事君之道越十六年二月二日葬於伊闕縣之萬安山詔賜雜物百段給儀仗往還禮也亭連長樂城枕高都守闕塞者汝寬適伊川者辛有北瞻洛汭尚想元凱之境東望邢山依然國僑之基夫人陽翟縣君河南褚氏卽太常卿陽翟康侯亮之女中書令河南郡公遂良之妹也宋公子之流派褚先生之苗裔宏夫人之禮傳淑女之詩有文在手歸於魯國有鳳和鳴適於陳氏邑之石窳縣以封邱夫尊於朝妻貴於室仙人

暫別初悲寡鶴之聲寶劍纔分終合雙龍之氣以某年月日薨於越某年月日祔建昌公之舊兆長子師本太穆神皇后挽郎襲建昌公歷韓王府祭酒岐州司士參軍定州安喜縣令譽聞州里學富邱山以卿子而爲郎以象賢而開國朝遊楚澤暮宿燕宮東臨石柱雍爲積高之地右會長星唐是中山之邑出遊隣國不以陪臣見朝上謁邦君不以屬官相待洛陽朝覲適見雙鳧東都墓田行悲駟馬以某年月日終於某所越某年月日卽陪葬於先兆次子師表左千牛備身遷尚輦直



長歷許州臨潁博州堂邑滄州樂陵緜州萬安果州西  
充五縣令能傳祖業克嗣家聲有言偃之文章兼仲由  
之政事晨陪紫極繞鈎陳之六星旦奉黃麾屯玉車之  
千乘至若繁昌土宇魏文帝之壇壇堂邑提封漢陳嬰  
之侯國河分九道渤海東臨江派五津崑崙北指莫不  
愛人以禮爲政以德鍾離意之禁暴不用尺刀公孫述  
之有神能持五縣次子師元雋州都督府嘉徵縣丞次  
子師楚夔州都督府雲安縣令芝蘭有秀羔鴈成行渙  
北數十尹莫大邛都之縣邑東七百里惟有巫山之峽

言其縣職夔龍入於闕門敘其宰人鸞鳥翔於學舍咸  
能生盡其養喪盡其哀積粟萬鍾思負米而何得棖題  
三尺泣吾親而不見卜其宅兆麟鳳隨其岡巒陳其簠  
簋春秋變其霜露思傳舊德武建豐碑戴安道作頌於  
鄭元蔡伯喈披文於郭泰魏武皇讀而稱妙非所望焉  
夏侯湛見而陋之固其宜也銘曰

厥初兮后稷導生人兮知稼穡降及文王精翼日兮衣  
青光平東遷兮邾鄆晉上賓兮帝鄉秦三將兮繼代漢  
五侯兮克昌比琅山兮峻極等淮海兮靈長惟祖考兮



鼎盛佩金璋兮疊映彼山川兮降靈生玉樹兮青青成  
張良兮昴宿乘傳說兮箕星出忠兮入孝武緯兮文經  
陳嘉謨兮制千里摘藻思兮挾天庭有隋兮喪亂土崩  
兮瓦散皇運兮權輿人神兮攸贊值笙鏞兮變響屬天  
地兮貞觀河兩日兮事殷井五星兮歸漢帶長劍兮曄  
煜擁幡旌兮照爛周命兮惟新雲雷兮尚屯控東南兮  
荒景負江海兮未賓陳禮樂兮命使動輜車兮鞞鞞用  
蛇符兮澤國頒虎節兮山人專一方兮革面重九譯兮  
稱臣天垂兮星紀地連兮交趾山草樹兮潛移蜃樓臺  
兮鬱起遷合浦兮太守爲廣州兮刺史臨漲海兮明珠  
飲石門兮貪水侃沖天兮八翼代出身兮萬里全蜀兮  
奧區枕邛笮兮倚巴渝有靈臺兮古跡有充國兮舊都  
豐貂兮左珥介士兮前驅濬三刀兮持節昌兩日兮剖  
符降鳴鳩兮大夏騁神馬兮長衢畢昴兮分野蘭堂兮  
四下漢皇帝兮國都耿將軍兮壇社若恒山兮詔鄧猶  
朔方兮命賈李北平兮漢飛郭并州兮竹馬瞻太階兮  
坐躡惜天年兮不假伊天姓兮潁川有美人兮嬋媛桂  
生兮因地女嫁兮因天見乘龍兮奕奕覩飛鳳兮翩翩



知遠瑗兮有禮笑虞邱兮未賢始銜悲兮晝哭終共盡  
兮千年卜龜謀兮習吉陳旨酒兮嘉粟車徒儼兮在門  
旌旆紛兮竟術循洛橋兮南渡從國門兮右出樹蕭蕭  
兮有風雲慘慘兮無日指邱陵兮一閉與天地兮相畢  
悲孝子兮純深孰憂思兮可任訢高天兮泣血踏厚地  
兮崩心樹碑兮神道無媿兮詞林歷陽之都兮水沒圓  
嶠之海兮山沈俾外孫兮幼婦生白玉兮黃金

唐贈荊州刺史成公神道碑

成氏之先有周之後姬文受命三十八王邠伯象賢二

十一代漢之少府國家維城晉之廣楊王室藩屏公諱  
知禮其先上谷人也子孫避地徙於某曾祖休寧後魏  
汾州刺史齊特進左右衛大將軍宇文朝江州刺史隋  
成陽郡公諡曰武勳格皇天澤充區宇該備寵榮禮也  
命賜祖少遐北齊民曹郎中宇文朝地官上士襲成陽  
公建國之屬以訓五品以親百姓父綽隋金紫光祿大  
夫唐深州刺史上柱國天子大夫金章紫綬天王使者  
皂蓋朱輪公誕保靈和受茲分福講之以學合之以和  
純粹以積其中文明以宣其外出於口者必是先王之



言萌於心者莫非君子之德戒慎乎其所不睹恐懼乎其所不聞時止時行左宮右徵在朝濟濟在家雍雍祇服宏業克丕堂構襲成陽公歷箕州平城洛州邯鄲二縣令武鄉里閭榆社隄封公宰平城日宣三德悲歌相聚絃服成羣公宰邯鄲雷震百里儀刑嘉誨範乎人倫令聞廣譽塞乎天壤將蹈九列平三階豈意太和交薄而天道難諶降年不永春秋若干以某年月日終於某所夫人宣城縣主聖神皇帝之堂姊王姬外館之長女夫人道峻於閨房名輝於邦國我大周敘洪範作武

成大資而萬姓悅垂拱而天下理法號惟舊制贈荊州刺史生則唐堯不用沒則周武追封爲龍爲光有始有卒立名於後以顯其親反葬於周不忘其本以某年月日歸葬於某原碣石恒山燕南趙北禮儀光被宗族相臨大夫弔桓子之喪天子歸惠公之賵蘧瑗之葬不害良田孔某之塋不生荆棘長子司衛少卿兼檢校魏州刺史大辨中子左鷹揚將軍大方少子朝議大夫行司漢主簿大琬等門承四代德盛三賢有終身之憂盡生人之本璽冊褒贈宜宣無窮景鐘勒銘若古有訓嗚呼哀哉



銘曰

神岳之英大川之精如山之峻如流之清行之斯立言  
 之斯成登車發耀在邦有聲傳於舊國舊國惟平宰於  
 二縣二縣惟寧余聞舊說天鑒孔明誰謂靈誕喪落淑  
 真永錫不匱克揚其名冊書光寵沒有餘榮系曰列星  
 垂象兮炳天光白露為霜兮沾人裳彼蒼天兮殲我良  
 列星垂象兮炳天暉白露為霜兮沾人衣九原可作兮  
 吾與歸

益州溫江縣令任君神道碑

漢丞相之尊官大位乘輪滿於十人齊景公之利用厚  
 生有馬盈於千駟羽旄冠劍縱金鳴玉疊其前苑囿池  
 臺清歌妙舞喧其後崇高在於寵祿大欲存於食貨義  
 然後取橫玉帶以當仁道不虛行坐鹽梅而自得若乃  
 時之不與數之不通貴賤任於天窮達由於命左太沖  
 之詠史下僚實英俊之場嵇叔夜之著書賤職為老莊  
 之地雖復勢力以高下相懸尊卑以商周不敵孔宣父  
 中都之小宰幽厲多謝於陪臣陳仲弓太邱之一官公  
 卿有慚於縣長是以德成者上道在斯尊陶潛則安枕



北臆言偃則鳴絃東武抑揚足以儀四海顧盼足以破  
三軍代有人焉斯爲盛矣君諱晃樂安博昌人也其後  
因官遂家蒲州之永樂天子令德軒皇爲誕姓之源諸  
侯計功薛國在宗盟之後西京執法則有御史大夫東  
漢循良則有會稽都尉任光鄉里之忠厚任隗朝臣之  
鯁直益州從事術數知名臨海真人清貞克已況乎東  
西海岱強齊九合之都表裏山河全晉三分之國車馬  
雷駭衣冠鼎盛盟書百代可謂功臣遷徙邱陵實惟豪  
族曾祖顯祖熙考憬並策名天爵獨步人師懷素履之

幽貞保黃裳之元吉張家碑謁荊州有七代孝廉荀氏  
鄉亭潁川有八人才子君外資剛健內育文明合千載  
聖賢之間鍾五行金木之秀王恭濯濯春柳懷風和嶠  
森森寒松列景有曾參之孝有史魚之直有子夏之文  
有冉求之藝先王德行固名言而在茲大聖溫良亦顛  
沛而於是當朝一見許其王佐之才行路相逢加以美  
人之贈解褐爲家令寺主簿天王太子之位赫赫前星  
天地長男之宮巖巖左闕出身事主元良永固於萬邦  
束髮登朝七鬯不驚於百里秩滿授將作監主簿千門



萬戶張華窮壯麗之圖東主西賓班固盡謳謠之致職  
掌宮觀是名將作大司馬桓温之府績用在於元琳大  
將軍竇憲之曹文章寄於亭伯累遷右衛長史南京左  
掖上將陪藩北落師門天軍列衛東觀漢記梁統有清  
白之名中興晉書薛兼有恪勤之譽詔遷朝散大夫行  
益州温江縣令華陽西極漢水東流背面通秦越之鄉  
左右夾巴涼之地風烟可接懸車束馬之山雲物潛通  
織女牽牛之象神仙所宅則有二十四居途路所經則  
有五千餘里金城石郭還聞上代之風國富人安時聽

中和之樂於是乎龍泉獨斷龜旒旁求品命千名封疆  
萬戶暫過云亭乘軒之望可知且詰中軍理劇之才有  
屬旌孝悌勸農桑省徭役恤鰥寡所以一縣稱平所以  
百城尤最蕭育是杜陵男子不入後曹黃浮非鄉里所  
知不寬同歲洛陽行馬門士無心齊國池魚權家絕望  
鄭文公邵陵之縣但稱男子之名師尚父灌壇之鄉惟  
有神人之哭實謂樞機八座上下三階豈惟縛柱鞭絲  
操刀製錦巫馬期之任力樊起乘星鍾離意之悅人災  
生解土享年五十有九以儀鳳二年六月二十五日卒



於官第夫人姚氏徵士神俊之女也壽邱仙葉媯水靈  
苗定姚信之璣衡審姚光之術藝明星燄燄不臨太邱  
之前暮雨沉沉不散巫山之曲婦人謂嫁女子有行織  
紕組紉棗脩榛栗南斗千齡之匣忽愴沉江北方三代  
之儀終悲共穴先以咸亨三年七月二日終西京翊善  
里之私第越儀鳳三年冬十一月一日歸祔於永樂縣  
歷山之平原卜虞芮之閒田帶關河之設險居人致祭  
桐鄉有朱邑之祠怪力成墳葉縣有王喬之墓君燕趙  
奇士神仙中人容貌魁梧衣冠甚偉揚子雲之窮巷好

事來遊段干木之閭居通侯展敬自陳力就列居家可  
移妾本絕於織蒲馬無聞於食粟原子思之厚秩徧給  
鄉人孔文舉之中罇延留坐客加以徧觀圖史尤精釋  
教夢幻泡電知一切之皆空園林貨財見三陽之已淨  
遭時屯坎浮生蹇剝佳人不再荀奉倩之傷神赤子無  
期潘安仁之慘慟天平到此命也如何及其瞑目少城  
歸魂舊壤平原古樹惟餘孺子之墳春露秋霜非復皋  
繇之祀於是鄉鄰作主朋友加麻撰德銘之於素常披  
文刻之於翠石魯哀公作仲尼之誄天不憚遺蔡伯喈



為有道之碑人無愧色銘曰

軒帝之族漢朝之臣西州智士東海真人豪傑天縱衣  
 冠日新實生其德必有其鄰道在為貴知幾則神氣沖  
 南斗價直西秦大蒙之信太平之仁辨窮非馬學究成  
 麟孝友為政觀光利賓重明比德四一作少海為春宮室  
 之象南斗北辰甲兵之衛閭闔鈎陳山控金馬江迴玉  
 輪天文并絡地紀梁岷庭前置水甌內生塵園蠶有績  
 野雉來馴時命屯蹇生涯苦辛寶釵虛贈玉樹長淪厚  
 一作德無輔清一作仁不親百年天枉一作一巨歸真

雷鳴之下長河之濱旌旃委鬱徒御逡巡悲風泪起並  
 下霑巾死而可贖人百其身

原州百泉縣令李君神道碑

金城裂地之災玉弩驚天之禍躐崑崙以西倒蹋泰山  
 而東覆三微歷數盡薰歇以聲沉萬國衣裳咸土崩而  
 瓦散是故殷憂啟聖聖人騰海岳之符草昧興王王者  
 受風雷之祉則有思窮圖讖潛觀赤伏之萌識洞機祥  
 暗察黃星之兆天懸兩日詢去就於河宗地震三川考  
 興亡於柱史危邦不入亂邦不居翦荆棘而叩天門臨



壇場而對休命及其元黃再造日月重輪功成而不居  
名遂而身退南華吾師也親居賤職東方達人也安乎  
卑位然後武城絃唱優游禮樂之中彭澤琴樽散誕羲  
皇之表雖杜當陽之文武蘭菊恒存而薛孟嘗之池臺  
風烟遂歇悲夫死生命也貴賤時也用之則行舍之則  
藏出處者君子之恒務左右之攸宜吾聞其語矣今見  
其人也君諱楚才衛州衛縣人也昔繞樞神電軒轅氏  
之馭百靈貫月祥星顓頊氏之臨四海金科作範商邱  
有帝系之雲玉札披圖幽谷有貞人之氣由是公侯策

命歷千載而彌昌鐘鼓歡娛經百王而不替豈直將軍  
列位孫吳暗合之兵協律當官天地冥符之樂若斯而  
已矣曾祖裕後魏東宮舍人太子洗馬使持節徐州諸  
軍事徐州刺史燉煌郡開國公贈兗豫二州刺史真城  
西望高關東臨非無置驛之歡實有前軍之寵瑯琊負  
海八門都督之榮斥漳瀕河百代封侯之貴大父昌北  
齊彭城王府中兵參軍事隋濟陰郡守襲封燉煌公文  
場筆海炤爛等於星辰辯囿談叢鏗鏘協於風雅九千  
里之丹鳳始踐王門七十日之黃龍初階郡職考孝友



隋晉州岳陽縣令顏回稱太平王佐月角殊姿伸由稱  
禮義霸臣星衡詭狀唐都晉野有恒山太嶽之風墨綬  
銅章有錯節盤根之化若夫于公之宅駟馬高驅辛氏  
之門五龍齊駕英靈不已還當命代之期將相有徵克  
保承家之業東郊競日探祕跡於璣衡西蜀談元測靈  
心於造化雄才壯思首九奏而和八音廣見洽聞披五  
車而誦三篋加以興居禮樂出入孝忠簡於一人備於  
萬物弓旌疊湊始命賢良幣帛交持載徵巖穴從微至  
著濫觴萌括地之波積小成高覆篔簹漸排雲之構隋大

業十二年補謁者臺散從員外郎非其好也屬千三百  
運百六災年諸侯窺玉鼎之尊天子厭金陵之氣蚩尤  
則命風召雨桀黠於中州共工則折柱傾維崩騰於海  
縣能扶天下之危者必據天下之安能除天下之憂者  
必享天下之樂我高祖神堯皇帝所以從人望宅靈心  
振天關迴地軸鼓聲雷駭親張霹靂之威旗羽星懸手  
握招搖之柄君冲情索隱妙算知來候東井而考前聞  
裂西河而尊故事上畧中畧奏山石之奇謀文韜武韜  
奉川璜之祕訣義寧二年授車騎將軍累加開府武德



五年遷右衛二十四府右車騎將軍仍於邛州鎮守皇  
階甫闢猶勞尉候之靈天步初夷尚有風塵之警示之  
以文德陳之以武功所以外戶不扃所以重門罷柝六  
年轉中山府左列南州舊俗淫其白獸之祠西焚餘毗  
昔我黃龍之約王師直進陵劍棧以長驅廟畧遐宣指  
銅邱而決勝七年詔君討襲楓天棗地金門玉帳之營  
方卦圖著剗木弦弓之射以此眾戰誰能敵之以此攻  
城何城不克雷出而星曜龍騰而鳳飛一鼓而擒四姓  
三戰而平百濮大夫耆老非惟二十七人拓土開疆豈

直五千餘里返行飲至舍爵策勳焉禮也其年加上大  
將軍賞口十六人并良馬一疋而俄以爭功得罪游俠  
從軍特降王綸遐遷騰府逼塞有命潘安仁之緒言富  
貴在天卜子夏之餘論無階封禪空嘆息於周南絕望  
夏臺竟棲遲於漢北太宗文武聖皇帝承高皇之大寶  
奉天帝之休期雷雨八瀛光華四極旌賢赦過惟新之  
命屢覃念功簡勞惟舊之恩累洽貞觀元年授長樂監  
仍命於北門供奉宜春禁苑太液神池浸石菌而揚波  
擢金莖而挹露南經丹徼恒陪萬乘之遊北繞黃山再



奉三驅之禮當是時也穆穆焉皇皇焉濟濟焉鏘鏘焉  
一陰一陽而有序自南自北而無外猶復中宵不寐殷  
勤多士之林晷景忘疲渙汗非常之辟十四年應詔四  
科舉射策登甲第明於國家之大體達於人事之始終  
可謂宰相之璞可謂皇居之寶洛陽才子一承宣室之  
談魯國儒生行踐中都之邑尋授靈州鳴沙縣令累遷  
原州百泉縣令科一作斜通紫微印一作却負黃州涼秋九  
月寒沙四面平雲匝隴處處而秋陰圓魄低關蒼蒼而  
夜色君乘輜演教佩紱臨人德被三城風移五縣抽琴

命操還臨單父之堂繫石飛鳴卽對李泉之學明以御  
下將水鏡而通輝清以立身共冰壺而合照神行有感  
方登玉鉉之階靈化無方獨嘆瓊棺之墓春秋七十有  
一以顯慶元年十二月八日終於官舍君年十一丁內  
艱朋友相哀家人不識昔稱曾閔今日苟何近古以來  
未之有也隋郡東曹掾江溢見而嘆曰此真可謂保家  
緯化嗟尚者久之大業末年皇綱漸紊不掃一室自懷  
包括之心獨守太元且忘名利之境於時魏特進房僕  
射杜相州等並以江海相期烟霞相許付同心之雅會



訖刎頸之良遊或閉戶讀書累月不出或登山涉水經日忘歸斯賢達之素交蓋千年而一遇洎塵埋五岳海沒三山辭殷而奉周背楚而歸漢深謀遠慮卽良平無以加也行軍用兵則彭韓不能尚焉數奇命蹇遂無望於高門日往月來竟銷聲於下邑情均寵辱則萬象同歸跡混彭殤則百齡俱盡浮生若寄大漸彌留遺誨子孫庶幾薄葬等梁鴻之宅兆邈矣他鄉符祭仲之高居依然新鄭唯仁與達君其有焉存榮沒哀此之謂也卽以某年月日葬於某原夫人廣平宋氏齊尚書左丞士

順之曾孫隋建安郡司法長文之季女霜淒月瑩菊豔茗華淑問秀於閨房柔風洽於詩禮琴前鏡裏孤鸞別鶴之哀竹死城崩杞婦湘妃之怨長子金河府校尉上柱國輔仁等十輪方駕萬石駢衡窺上帝之兵鈴入先王之冊府指蒼天而永訴血下霑襟對白日以長號悲來填臆於是總麻執友素蓋賓朋傳祖德於高陽考豐碑於太學庶使城隍一變猶知鄧艾之名陵谷三遷尚識鍾繇之字銘曰

玉斗之英瑤光之精巡河并洛握紀提衡柱史論道將



軍用兵陸離簪紱奕葉公卿岳牧騰譽弦歌有聲階蘭  
疊影巖桂增榮山澤通氣風雲表靈凝脂點漆月角珠  
庭白玉無玷黃金滿籛忠爲令德孝實天經朋友千里  
烟霞百靈琴尊野尚松竹山情數屬郡海時逢鬪星黃  
龍電震白騎雷驚赫矣高祖元亨利貞聖人有作天下  
文明自此提劍因茲間行攀鱗北海附翼南溟水火之  
陣孤虛之營左提右挈東討西征巨猾斯斬元克載清  
功符衛霍知若良平自滿知損居中忌盈蕭條異縣坎  
壈浮生降以中旨賓於上京陳書詣闕對問揚庭山連  
鴈塞野接龍坳期月而已三年有成波瀾不息箭刻無  
停梁木其壞高臺已傾關雲斷絕隴鴈飛鳴頓雙鳧於  
葉縣踟四馬於騰城



